

李文忠公奏稿

李文忠公奏稿

卷之七十目錄

覆奏直隸水田難成摺

光緒十六年十二月初二日

學堂加費書識加糧片

光緒十六年十二月初二日

海防用款立案摺

光緒十六年十二月十一日
附清單二件

酌議土藥稅燈摺

光緒十六年十二月十七日

機器局報銷摺

光緒十六年十二月十七日

各省捐助直賑數目摺

光緒十六年十二月十九日

工賑收支數目摺

光緒十六年十二月十九日
附清單

李文忠公奏稿卷七十

全集一之七十

桐城吳汝綸編錄

覆奏直隸水田難成摺

光緒十六年十二月初二日

奏爲遵

旨體察直隸地勢分水溉田不能消除水患且多窒礙難行恭摺
覆陳仰祈

聖鑒事竊臣承准軍機大臣字寄光緒十六年八月二十二日奉
上諭給事中洪良品奏直隸頻歲水災請籌疏濬以興水利一摺
據稱疏濬不可緩者有六似難而實易者有三行之大利者十有
一所當豫計者有五請飭集議興辦等語所陳各條是否可行著
李鴻章體察情形妥籌具奏等因欽此遵卽轉飭辦理永定河工
泉司周馥候補道吳廷斌會同籌賑局司道等體察情形妥細籌

議茲據該司道等核議詳覆前來臣查核原奏該給事中請修水利大致以開溝渠營稻田爲急疏中所稱不可緩者六似難而實易者三行之大利者十有一累累數千言反覆推闡無非極言未辦之害已辦之利及當今易辦之勢如果直隸溝渠可以盡開稻田可以盡營自不難收此十一大利惟查以上各條大都沿襲舊聞信爲確論而於古今地勢之異致南北天時之異宜尙未深考其所陳利害今姑勿論僅就原奏所當豫籌者五條詳加籌度五條之中尤以審地勢一條爲主腦而籌經費選賢才持定見策工作皆其後焉者也考古冀州跨有今直隸晉三省之地唐虞夏商建都三面環河昔之黃河由河間天津入海以地勢揆之南北泊卽禹貢大陸澤久已淤爲沃衍東西淀卽宋時塘泺爲遼宋所分界今亦半成沮洳任邱縣境內之鄭州鎮爲古州治今則形如釜

底天津之三汊河爲宋時黃河入海之口今海口遠在大沽代遠年湮滄桑變易高原或成陂澤窪下漲半填淤殆非人力所能爲夫以太行左轉西北萬峰盪天伏秋大雨口外數千里千溪萬派之水奔騰而下畿南一帶地平土疏頃刻輒漲數尺或一二丈衝蕩泛溢勢所必然

聖祖仁皇帝慮清濁合流之不可制也乃築千里隄格淀隄使淀與子牙河各行一路

世宗憲皇帝慮永定河南行之淤淀也令引渾河別由一道改移下口其餘官隄民隄今昔增築綜計不下三四千里沙土雜半險工林立每當伏秋盛漲兵民日夜防守甚於防寇豈有放水灌入平地之理今若沿河居民以開渠引水無不錯愕駭怪者顧謂民志易從勢順易理耶且水田之制不獨地勢難行卽天時亦南

北迴異春夏之交布秧宜雨而直隸彼時則苦雨少水涸今濫陽
各河出山之處土人頗知鑿渠藝稻節閘芒種上游分水入渠則
下游舟行苦淺屢起訟端東西淀左近窪地鄉民亦散布稻種私
冀早年一穫每當伏秋漲發輒遭漂沒此實限於天時斷非人力
所能補救者也宋何承矩元郭守敬成集明汪應蛟徐貞明董應
舉左光斗諸人皆謂直隸可營水田言之鑿鑿宋元事遠難以取
證今以明代已行之事考之徐貞明僅營田三百九十餘頃汪應
蛟僅營田五十頃董應舉營田最多亦僅一千八百餘頃然皆兼
粟並收並不盡種水稻且其意在墾荒殖穀並非藉以消滅全境
水患今訪其遺跡所營之田非導山泉卽傍海潮絕不引大河無
節制之水以資灌溉安能藉減河水之患又安能廣營多稷以抵
南漕之入後人拘守陳編遂謂當日諸人未能久任以竟厥功其

亦弗思甚矣雍正五年怡賢親王大學士朱軾興修直隸水利四年之閒營治稻田六千餘頃然不旋踵而其利頓減九年大學士朱軾河道總督劉於義卽將距水較遠地勢稍高之田聽民隨便種植乾隆九年大學士高斌吏部尙書劉於義復加相度專於河道施工奏明營田應順民情只酌借井陘等縣民人工本銀數千兩是營田並未能加多也當雍正乾隆年間

聖明裁斷於上羣臣奔走於下帑項充足賞罰風行其規模迥非前代可比而收效祇有此數可見直隸水田之不能盡營而踵行擴充之甚不易也恭讀乾隆十二年四月二十八日

上諭直隸水利關係綦重是以

皇考特命怡賢親王及大學士朱軾等督修欲營水田以備不虞後以南北地利異宜難臻績效等因欽此又恭讀乾隆二十七年

十一月

上諭范時紀摺奏京南霸州文安等處地勢低窪易致淹浸請設法疏通添築隄埝改爲水田一事此不過偶以近來一二年閒雨水稍多竟似此等地畝素成積潦之區殊不知現在情形乃北省所偶遇設過冬春之交晴霽日久便成陸壤蓋物土宜者南北燥溼不能不從其性卽如附近昆明湖一帶地方試種稻田水泉最爲便利而蓄洩旺減不時灌漑已難徧及儻將窪地盡令改作秧田當雨水過多卽可藉以滯用而雨澤一歉又將何以救旱從前近京議修水利營田未嘗不再三經畫始終未收實濟可見地利不能強同亦其明驗等因欽此仰見

聖明洞燭利病考究精詳

謨訓昭垂允宜遵守後世臣民可毋庸輕議更張矣卽如天津地

方康熙年間總兵監理在天津城南墾水田二百餘頃不久被河水淤廢咸豐九年親王僧格林沁督師海口在鹹水沽等處墾水田四十餘頃嗣以旱澇不時迄未能一律種稻而所費工本已屬不貲光緒初年臣以海防緊要不可不講求屯政曾飭前湖南提督周盛傳在天津東南鄉開挖引河墾水田一千三百餘頃用淮勇民夫數萬人經營六七年之久始獲成熟此在潮汐可恃之地役南方習農之人尙且勞費若此若於腹地五大河經流多分支派穿穴隄防濬溝遂於平原易黍粟以秔稻水不應時土非澤壤竊恐欲富民而適以擾民欲減水患而適以增水患也至原奏籌經費條內謂請添百餘萬金再移工賑百十萬金以爲水利開基後復分年籌費限以十年竣事查本年水災仰蒙皇恩優渥先後所發順直銀米皆係辦賑要需災黎待哺嗷嗷何

能奪貧民口食移以辦此且被災饑民老幼婦孺居多豈能概令
工作以代賑撫直隸庫儲極絀供億浩繁亦斷難歲籌鉅款議辦
營田諸事又原奏策工作條內請以西洋滑河機器施之永定各
河又請於伏秋汛後挑切淤灘又請於海口多開引河以暢去路
查此三事固人力所能行者西洋挖河機器船陸續共購三隻一
在大沽口外遭風沈溺一已報廢現僅存一隻頻年在東淀挖泥
培隄水深隄寬頗有效驗但購船養船之費爲數過鉅實無餘力
多置永定河則挾沙帶泥來去靡定自來不通舟楫機器船無從
駛入且灘寬隄遠所挖之泥不能送堆於岸仍屬無益伏秋汛後
挑切淤灘原爲去河內頂衝之險今欲以裁灘多少爲河員殿最
大抵河員不患工多只患無工可辦此項經費浩大祇能相機酌
籌未便月請添款海口多開引河議者頗多然必審酌地勢之宜

蓋減水分溜須於上游片關一途入海方於全局有裨查直隸五大河惟南北兩運距海稍近各有減河南運減河在山東境者有四女寺哨馬營兩處在直隸境者有捷地與濟兩處自道光咸豐以來各減河皆就淤廢是以全河之水悉注天津三汊口其捷地興濟舊河久成平陸屢議勘辦輒以工大費鉅而止光緒六年臣飭前湖南提督周盛傳墾闢水田自靜海縣之斬官屯運河東岸至興農鎮開挖減河一道直接該軍營田之河分洩盛漲入海十三年臣又會同山東撫臣張曜派員挑挖四女寺減河宣洩南運河盛漲稍著成效北運減河有王家務筐兒港二處又於天津之霍家嘴挑挖減河一道添設滾水石壩分溜甚暢同治十三年會於天津城東開濬陳家溝減河一道名曰金鐘河分由北塘歸海亦減海河正溜十分之三本年復調淮練各軍重加修治此外實

無可再議分減之處臣兼任河防但能有裨民生曷敢稍執成見溯自同治十年以後直隸屢被水災修培隄岸疏濬支流幾於無河不隄無工不辦深知部庫艱絀不敢多請賴各省官紳商民時相解推集腋遠助厯查成案直隸治河之勤勸捐之多未有若近歲者在尋常漲發之年無不獲保安瀾觀安州雄縣文安大城天津靜海各低區有向來棄爲汙萊斥鹵者皆播種殆徧絕少曠土雖不能盡墾水田亦可謂地無遺利矣今夏霖雨決旬異常大漲爲百十年所未有河身不能容納隄岸遂多漫溢甚至隄外之水瀝水亦積深數尺此誠困於天時地勢之無可如何非盡由人之不臧也地方官更惟有急圖塞決多方疏消以冀河流早日順軌農民復業卽小民所亟亟籲求者亦莫不以此爲急現在各河漫口臣已督飭各該管河道分別一律堵合惟兩水夾隄難於取

土明春尙須加高培厚以資保障此外各大河正隄及各減河分
支擬俟來春派員分別查勘應修築者修築應疏濬者疏濬統視
力量之所及籌款設法補救以期仰副

宵旰焦勞之至意至於開墾水田祇可因地制宜量爲勸辦以收
一隅之益斷難全力大舉貪迂遠無成之功該給事中所陳各條
詳加體察實屬窒礙難行應請毋庸置議理合據實覆陳伏祈

皇上聖鑒訓示謹

奏

學堂加費書識加糧片

光緒十六年十二月初二日

再海軍衙門奏定北洋海軍章程案內聲明章程容有未備及臨時應行變通者隨時酌擬具

奏等因查北洋海軍精練後營練勇學堂係就原有水師屯船改設專爲招募沿海幼童練習兵輪水手技藝以備各船挑補缺額之用屯船月支公費銀四十兩自改爲練勇學堂並未議定公費數目經海軍提督丁汝昌以該學堂營房操棚比較屯船處所爲多應需費用卽較屯船有增酌擬月給公費銀六十兩當飭海防支應局會同直隸臬司周馥議覆查明水師屯船月支公費銀四十兩應經造報准銷有案今既改爲精練後營移駐劉公島練勇學堂每月應需油燭紙張並購辦修擦鎗礮物料及添置一切零件費用較船內爲繁每月至少須加銀二十兩擬月給公費銀六

十兩自光緒十五年正月起支按京二兩平核發仍加閏扣建在海軍雜支等項歲需三萬兩款內勻撥又海軍章程內載書識在船當差月支銀十二兩在岸當差月支銀九兩親兵在船當差月支銀六兩在岸當差月支銀四兩五錢惟提標書識六名親兵二十名並未分在船在岸各幾名從前月支餉項均照在岸核給惟海軍提督常年駐船督率操練其分撥在船當差者未免苦累經該提督派定除在岸書識親兵薪糧仍照章開支外其在船書識四名每名月加銀三兩其十二兩在船親兵八名每名月加銀一兩五錢其十二兩均與定章相符合其月加銀二十四兩亦自光緒十五年正月起支由支應局司道詳請

奏咨立案前來臣覆核無異除咨海軍衙門戶部兵部立案外所有海軍練勇學堂加支公費及在船提標書識親兵照章加給薪

精緣由埋合附片陳明伏乞

聖鑒謹

奏

海防用款立案摺

光緒十六年十二月十一日

奏為光緒三十四年北洋海防用款應行立案各項先開陳明清
單奏報隨後造冊請銷恭摺仰祈

聖鑒事竊查前准總理各國事務衙門會同戶部議撥南北洋海
防經費奏明由督辦大臣將用款數目咨報總理衙門及戶部查
核原以籌辦海防事屬創始一切用款皆無成例可循亦非他項
軍需可比是以僅令將用款數目咨報嗣經戶部議奏報銷程式
並定戶民工三部分銷章程又令於事前奏明報部立案事後方
准核銷等因臣以立案之意必部中無案可稽者始行奏咨以備
核銷時有所稽考其曾經報部有案及常年照章支用各款自毋
庸再行立案北洋海防取法泰西諸國凡購物製器用人頭緒較
多擬屆一年將應行立案各款分別奏咨庶辦理可期簡易而稽

核亦有依據。經陳明並將光緒十二年以前用款造送清冊。經部准銷。茲查自十三年正月起到十四年十二月底止。經支北洋海防經費。除舊有各船艇魚雷水雷各營原支薪糧煤斤號衣旗幟水師武備兩學堂電報總分各局行營製造局大沽船塢旅順口魚雷營常年經費機器工程軍械子藥各項廠庫局內華洋文武員弁人等薪餉軍械局購造鉛丸皮紙起卸礮械工價各臺牆礮費馬乾郵費暨找付十二年以前訂購外洋軍火機器等項價腳旅順口嘮嘴嘴建造礮臺大沽建築收藏蚊船土塢未竣各工並一切照章雜支用款。十二年以前報部有案者。均毋庸再行立案。又新添魚雷大快艇敏捷板練船及旅順口水雷營庫照小輪船員弁人等薪糧公費業經專案奏咨。雇募各國洋員教習薪水川資等費。亦將合同鈔錄送部。准軍報銷局剔歸海防收銷行。

營製造局造子辛工由該局按年報部覆准亦毋庸再行立案此
外未買製造及原有各師船營局學堂添派員弁并旅順口威海
衛添設水師醫院武備學堂挑赴旅順口操礮學生人等新數暨
一切更定新支用款自應循案按款摘敘案由支數分別造冊開
單先行奏咨立案飭據海防支應局司道查明具詳前來臣查光
緒十三年北洋防費係海軍衙門按歲支額款指撥其添購外
洋軍火器械及添建礮臺庫廠等項工程本不在內疊經咨明海
軍衙門有案當此創立海軍之際欽奉

懿旨擴充辦理凡必須添購之器添建之工統籌全局需費正繁
部庫同一拮据勢難動請添撥北洋歲撥經費各省關又難解足
其額外用款苦費持籌如十三年找付十二年以前訂購外洋礮
械及添置英國新式快捷礮水師操用手鎗仿造荷乞礮子機器

又找付嘮嘴大礮臺蚊船土隔工料及添建威海衛水師運煤
鐵碼頭練勇學堂操廠等項共用銀三十餘萬兩十四年添購克
鹿卜十二生脫鋼礮子彈改造康濟船作為魚雷練船及添配雷
電各物又添建嘮嘴北山小礮臺及水師兩醫院收藏雷艇隔
廠等項共用銀十餘萬兩均不在額支數內蓋海防規制既漸擴
充則一切購械用人以及工程建造關繫操防要務難免歲有增
加當此帑項支絀之時全賴累年節省藉資挹注不敢涓滴虛糜
至水師各船艇及局隔學堂常年操習製造無一不采用西法即
應用各項軍火器械物料無一非購自西洋博訪周諮及其時價
最廉擇要購備並一切新支用款均係格外撙節實無絲毫浮濫
除俟造銷時再將各款詳細數目分晰開報並將清冊分咨戶兵
工三部外理合將十三四兩年用款分繕簡明清單兩件恭摺具

陳伏乞
皇上聖鑒
奏

謹將光緒十三年正月分起至十二月底止北洋海防經費
項下應行立案新支及更定各款開具備明清單恭呈

御覽

薪糧及雜支項下

一旅順魚雷營考取二三四五等班學生自正月起共加餉銀六
十一兩九錢二分又自四月起共加餉銀二十二兩六錢

一旅順工程局將原派員弁司事兵役人等分別增減計設二十
二員名月支薪糧公費銀五百三十九兩五錢

一天津水師學堂添設官醫生並魚雷機器匠升火等三名月支
薪工銀二十五兩

一天津武備學堂添設操馬三十四馬夫十名月支口糧馬乾銀
一百二十兩

一 大沽水師船塢增減華洋工匠月加支銀二百十七兩三錢
一 電報總分各局並各報房分別增減月加支銀一千三百七十兩

一 北洋大臣衙門添派電報委員知縣郭銘新月支薪水銀二十兩

一 劉公島水師機器廠添雇機器匠銅匠鐵匠三名月支銀五十兩

一 添派法文繙譯候選知府聯芳月支薪水公費銀一百兩

一 水師營務處添派繪圖學生戴清月支薪水銀二十四兩

一 添派隨辦洋務候選道劉鴻業月支薪水銀五十兩

一 咨調船政學堂學生李壽川等四名各月支薪贈銀十八兩又
教習羅熙祿月支薪水銀五十兩王福昌月支薪水銀六十兩又

該學生教習由閩來津川資行裝銀二百九十兩零

一威海衛劉公島添建操棚廠庫並操場圍牆泊岸土坡等工購用民地三十四畝零地價並籽種工本及遷房費等銀一千二百八十九兩零

一旅順口建造魚雷營局艇臺並洋教習住房購用民地三十七畝零地價及籽種工本銀五百四十八兩零

養船及運保項下

一北洋水師先後操練三等水手二百名月支口糧銀八百兩

一水師考取試用候差學生池兆嶺等十六名月支新贍銀六十

六兩又留用閩廠學生林葆懌等五名月支薪贍銀九十兩

一左右隊五號大魚雷艇月支油燭銀三十兩

一守雷小輪船管駕官月加領哨公費銀十二兩又添書識一名

月給辛工銀十兩

一武備學堂學生添練馬隊購用操馬三十四匹價銀四百二十七兩零

一天津武備學堂旅順魚雷營學生雷兵等乘坐兵輪出海操練津貼伙食銀四百十九兩零

一辦理朝鮮交涉通商事宜道員袁世凱領仁川口刺運北洋水師儲備塊煤三百七十七噸剝費捐力銀三百三兩零

一天津軍械局委解神機營鎗礮子彈銅帽等項四千六百十五箱什車船腳價銀六百九十一兩零

一購德國克鹿卜九生脫後膛鋼礮二十二尊礮架二十二具子藥車二十二輛子彈六千四百顆由德至香港運保等費銀一千一百八十二兩零

一購英國阿摩士壯廠水師備用單管馬克綏剎礮四尊礮架四座鋼炸彈二千顆由英至津運保等費銀二千五百十九兩零
一購德國克鹿卜廠十生脫半後膛鋼礮四尊礮架並隨件四份
引火子母彈鋼開花彈各四百顆由德至津運保等費銀三千三百二十五兩零

一武備學堂購沿海各礮臺需用測遠器五副由德至津運保等費銀五百二十七兩零

一購英國威布烈廠銀六出上等手鎗二千枝配帶零件二千副
合膛子彈一百萬顆由英至津運保等費銀七千一百二兩零
一購英德兩廠仿造荷乞礮子機器二十四副又仿造運礮子裝炸藥器具二副由英德至津運保等費銀一千三百四十九兩零
一由德國伏爾鏗廠購導海挖泥輪船備換斗輪等項器具十三

種運保等費銀九百八十三兩零

一由德國洋廠購操雷魚雷應配水衣汽表汽筒轉數表電光燈及修理魚雷器具由德至津運保等費銀二百二十五兩零

一旅順水雷營由英廠購操防應用雷電器具並各項物件由英至津運保等費銀七百九十三兩零

宋員及製造項下

一購英國阿摩士莊廠新式四十磅子後膛全鋼快捷大礮一尊並隨帶架具零件全份硬質彈銅引火銅子壳牛油鹿墊各一百五十件又購配設蚊船邊礮後門鋼底三十六副價值銀六千九百五十三兩零

一購英國威布烈鍍銀六出上等手鎗二千枝配帶零件二千副合膛子彈一百萬顆價值銀五萬一千四百二十三兩零

一購英德兩廠仿造荷乙礮子機器二十四副又仿造運礮子裝炸藥器具二副價值銀一萬一千八百九十九兩零

一北洋海軍由英廠購輪機電燈備用各件並算法書籍圖器具等項價值銀一千七百四十二兩零

一由德國洋廠購操習魚雷應配水衣汽表汽笛轉數表電光燈及修理魚雷器具價值銀五千二百二十四兩零

一購英國官製中國海圖三百十八張各國海圖十二副操礮書四百本價值銀二千五百三十四兩零

一超勇揚威康濟威遠四船購備常年操巡應用大批料物器具價值銀一萬一千七百十五兩零又劉公島水師機器廠購備常年應用料物價值銀一萬四百八十兩零

一由德國伏爾鏗廠訂購導海挖泥輪船備換斗輪等項器具十

二種價值棧租銀四千二百五十三兩零

一旅順口導海挖泥等船購備常年濟澳應用料物器具價值銀六千九百六十兩零

一旅順魚雷營雷艇雷廠購備常年工操應需大批料物器具價值銀一萬二千二百三十一兩零

一大沽旅順水雷營由英廠及津滬各洋行購操防應用雷電各器具並各項料物價值銀一萬一千四百三十兩零

一水師學堂購辦挑上練船學生並教練魚雷應用洋廠儀器書籍圖紙筆墨並綢鐵各件價值銀一萬二千五百十二兩零

一武備學堂購德國新式測遠鏡二具並架座零件二份價值銀三百八兩零又購化學需用器具藥物及工程隊需用長柄洋鋤價值銀八百二兩零

一大沽船購鍋爐大汽錘一副起重白油棕繩八千十七斤八兩鐵練三千一百二十三斤十二兩價值銀三千四百二十九兩零

一天津軍械局旅順工程局訂購北洋建築臺壘庫廠等工需用塞門德土一萬一百九十七桶半價值銀三萬二千八百二十六兩零

一旅順口沿海各礮臺及軍械各局訂購雙軌鐵路一千七百五十九丈五尺鐵車一百九輛連鐵墊板鐵軛盤螺絲釘魚尾夾板及零件全份又十寸圓白棕大力繩一根價值銀一萬六百五十二兩零

一北塘搭造浮橋調用天津道運漕滿料剝船十二隻應繳變價銀三百六十兩

一駐防山海關正定練軍操演格林礮車仿造洋式五馬鞍轡六

全副工料銀三百五十二兩零

一製造頒賞各洋員金銀寶星十面並佩帶木匣等件工料銀二

百九兩零

一天津軍械局修理來福鎗二萬八百五十九桿並購配鎗箱白

洋鐵皮四十七箱又製配車礮用裝藥皮盒等八十八副工料銀

六百八十九兩零

一大沽船塢承修超勇揚威康濟威遠六鎮操江利運飛霆快馬

遇順導海及廣艇等十七船並添購備用各件料價銀二萬一千

七百三十三兩零

一超勇揚威康濟威遠四快船及左隊一號魚雷快艇光緒十三

年冬季赴上海祥生洋廠刮底油艙並修配各件工料銀一萬四

千五十九兩零

一山海關水雷營歷年修理操雷平底大船一隻工料銀二百一兩零

一天津水師學堂添建魚雷小廠六間煙囪一座剝岸一道水井一口煤圈一座工料銀二千二百九十二兩零

一大沽海口礮臺添建存儲攔港輓木筏及鉛纜等件廠庫二十五間圍牆一道工料銀二千七百九十五兩零

一前敵營務處提督吳殿元承修大沽口蚊礮各船存儲軍械公所工料銀四百四十九兩零

一威海衛劉公島創建水師運煤鐵碼頭一座工料包價銀十五萬一千五百兩又建設北洋水師練勇操棚學堂廠庫並大小住屋共二百七間操場一道石圍牆十六道泊岸二道土坡一道工

料銀三萬六千三百二十三兩零

一旅順水雷營添建棉藥庫一座看庫住房一間圍牆一道工料銀一千三百二十一兩零

一旅順口魚雷營添建收藏艇塢一座石泊岸一道廠庫十四間工料包價銀一萬六千五百兩又添建洋教習住房並營門城樓看煤住房及弁兵廚房共二十間開挖水井十八口工料銀一千九百三十七兩零

一旅順口建設燈塔一座並存油及看燈庫屋三間工料包價銀一千六百八十兩

一旅順口山海關等處礮臺添設克鹿卜二十四生脫後膛鋼礮一尊月支礮費銀十二兩又添設九生脫後膛鋼礮八尊其月支礮費銀三十六兩又添設二十一生脫後膛鋼礮二尊其月支礮

費銀十六兩

查以上各款均係十三年分新增支項應遵照部章先行奏咨立案其一切例支款項及業經奏咨毋庸再行立案者均未開列

謹將光緒十四年正月起到十二月底止動用北洋海防經費應行立案新支各款開具簡明清單恭呈

御覽

薪糧及雜支項下

一天津武備學堂改派提調一員照案月支薪水銀五十兩

一水師學堂第五屆考試駕駛管輪各學生共月加贍銀五十七兩

一劉公島水師機器廠添雇廠匠藝徒人等二十名共月支辛工銀一百九十一兩又添派司事一名月支薪水銀十六兩

一武備學堂挑赴旅順學習臺礮水雷各事學生二十八名又夫役四名共月支薪飯工食銀二百九十兩

一添設旅順口威海衛兩處水師醫院學生及配藥人役等十名

共月支薪水工食銀一百六十八兩

一水師營務處添派繙譯魏濂月支薪水銀二十四兩

一正定練軍操礮繙譯兼充教習吳器堂月加支薪水銀十兩

一威海衛劉公島建造水師醫院基址購用民地二十七畝零並酌給籽種工本共支銀七百八十五兩零

養船及運保項下

一水師學堂挑赴威遠練船駕駛管輪學生三十六名共月支銀五百八十八兩

一水師督船大副一員月加薪水銀二十兩

一水師統領隨帶官醫生等三名共月支薪水銀九十兩

一光緒三十四兩年冬季北洋海軍提督丁汝昌統率各船操巡南洋因公電報共支報資譯費銀八百十七兩零

一光緒三十四兩年出使德國大臣代北洋訂購洋廠礮械及
因公發遞電報共支報費銀五百六十兩零

一招商局及洋商輪船承裝礮位子彈等件由上海運至天津煙
臺等處共支水腳銀二千五百五十一兩零

一購德國克鹿卜廠七生脫半新式過山礮彈及十五生脫生鐵
開花彈二十一生脫生鐵開花彈二十四生脫生鐵開花彈等項

由德至津運保等費銀一萬四千七百八十六兩零

一康濟兵輪改作魚雷練船由英德兩廠購新式電機電燈雷礮
等項運保等費銀二千八百一兩零

一購德國克鹿卜廠十二生脫口徑新式後膛長鋼礮並子母彈
開花彈由德運津運保等費銀三千三百五十兩零

采買及製造項下

一購德國克鹿卜廠十二生脫口徑新式後膛長鋼礮並子母彈
開花彈價值銀二萬一千四百三十五兩零

一水師學堂領用機器局各項料物器具並由上海勘驗軍火局
代購測遠儀器價值銀二千二百六十九兩零

一由洋廠訂購旅順口船塢停泊鐵甲鋼快等船需用鐵關大錨
又製造浮鼓鐵板價值銀二萬二千七百九十七兩零

一康濟兵輪改作魚雷練船由英德兩廠定購新式電機電燈雷
礮等項價值銀四萬六千八百八十六兩零

一超勇揚威康濟威遠敏捷等五船購備常年操巡應用大批料
物器具價值銀一萬三千四百四十八兩零

一劉公島水師機器廠購備常年應用料物價值銀四千三百四

十二兩零

一旅順口導海挖泥等船購用常年濟澳料物器具價值銀六千四百九十九兩零

一旅順口魚雷營雷艇雷廠購備常年工操應需大批料物器具價值銀一萬八千四百二十四兩零

一武備學堂仿造洋式行軍氣球並操球鎗水工料價值銀四千二百三十五兩零

一山海關水雷營添製操雷需用各種架座箱盤等件工料銀九十二兩零

一製造頒賞洋員金銀寶星等件工料價值銀二百五十二兩零
一旅順口工程局改修卸重木剝船並購起重金山松木桿工料價值銀六百六十三兩零

一沽船隔承修超勇揚威六鎮操江利運桿雷導海等十二船

料價銀一萬四千三百九十七兩零

一大沽船隔承造水陸各營需用大小舢板十三隻並各營修製領取各件料價銀二千九百三十四兩零

一康濟威遠兩練船光緒十四年冬季赴閩廠配換鍋爐輪軸改造艙位礮盤並全船一律修整及添置各件工料價值銀三萬八千八百十六兩零

一超勇揚威二船光緒十四年冬季赴上海祥生洋廠刮底油艙並修配各件工料銀二千一百八十七兩零

一天津武備學堂添築行營小礮臺工料銀一百二十九兩零

一旅順口白玉山威海衛劉公島各建水師醫院一所工料銀二萬七千五百十兩零

一旅順口改建操礮學生及洋教習學堂住房工料銀一千一百

八十兩零

一旅順口嶗嶗嘴北山添築小礮臺築庫官房兵房營門更房工料銀七千五百八十二兩零

一旅順口饅頭山城頭山兩礮臺添築護牆並添建子藥庫礮兵房工料銀三千五百二十二兩零

一旅順口蠻子營礮臺添築護牆並添建藥庫講堂巡房工料銀三千三百九十兩零

一旅順口威遠礮臺添築石牆並添建子藥零件庫改築礮盤添改兵房工料銀三千一百八兩零

一旅順口虎尾礮臺添築石牆操場臺階泊岸並改造藥庫兵房工料銀二千八百二十四兩零又西岸各礮臺添造拉礮石泊岸大路枝路木橋工料銀四千二百五十兩零

一水師學堂製給派上練船學生各項號衣褲號帽戰靴行囊等件銀七百七十七兩零

一光緒十三十四兩年北洋海軍提督製給隨帶駕駛管輪學生春夏冬三季官號衣褲靴帽等件銀一千六百八十兩零

一旅順口水陸營務處製給操礮學生青呢號衣褲戰靴草帽工料價值銀一百十五兩零

查以上各款均係十四年分新增支項應遵照部章先行奏咨立案其一切例支款項及業經奏咨毋庸再行立案者均未開列

酌議土藥稅釐摺

光緒十六年十二月十七日

奏爲查明直隸栽種土藥情形酌議徵收稅釐恭摺覆陳仰祈

聖鑒事竊臣欽奉光緒十六年四月十五日

上諭總理各國事務衙門戶部奏整頓土藥稅釐請飭詳查妥辦一摺內地栽種土藥爲中國出產大宗果能設法稽徵認真辦理既可裨益餉需且亦收回利權之一助並可以徵爲禁隱寓崇本抑末之意近聞吉林黑龍江呼蘭熱河及四川雲南江南淮徐等處土藥出產日繁各該省局卡徵收稅項官吏隱匿入己爲數甚鉅弊端百出以致徵多報少於國課毫無裨補若不及時整頓於洋藥併徵辦法大有關礙稅數必將日絀何以昭核實而裕餉源著各直省督撫詳察地方情形或於出產之處就地徵收或於販運過境嚴查走漏務當破除情面實力稽核將原定新定各辦法

迅速覆奏等因欽此當經飭令藩司俗長臬司周馥會同津海關道劉汝翼詳查案卷體察情形切實籌議茲據該司道核議詳攬前來臣查土藥稅釐按畝徵收似有實際然流弊孔多今先舉其不便之處直境所種罌粟零星無多固由沙瘠不宜亦因時藝不甚得法凡沃土近水有種數畝數十畝者餘或半畝數分或種於園邊屋角或今種此區明年改種彼區或一區之中與他物雜植村村不同年年不同必欲一一查明無遺無濫勢所不能且利之所在人思避就脫漏影射伎倆百出雖竭有司之智力無以勝之是難於稽查其不便者一種植既屬無多而收成豐歉不同因災緩免又每年不一凡種罌粟之地大半鄉僻不近大道官若不能處處踏勘勢必假手吏役則索詐之禍滋若聽民自報報而不實者罪之則告訐之風起是易於擾累其不便者二出於貨者曰稅

出於地者曰賦貨徵於商賦徵於農徵於商者以貨之權最計徵於農者以地之頃畝計今所徵者明明稅也苟不徵於貨而徵於地不以貨之權量計而以地之頃畝計民必驚爲加賦官亦畏其考成是名實不符難以持久其不便者三卽如蠶縣藥城光緒十二年擬辦按畝收捐該處民人稱曰煙糧恐成永額紛紛阻撓靈壽縣前擬按畝收捐縣民聚眾抗違總未辦有成效並聞山西州縣曾因按畝收捐幾釀重案是以山西現在專辦釐捐不辦畝捐此畝稅一事實屬窒礙難行也查總理衙門原奏及欽奉

諭旨皆云或於出產之處就地徵收或於販運過境嚴查走漏所謂就地者卽總稅務司申呈內之落地稅所謂過境者卽總稅務司申呈內之稅釐俱指按貨徵收而言今惟有就地徵收落地稅及過境徵收稅釐兩法博采眾論統籌全局尙屬可行竊惟土藥

徵稅本爲

國家不得已之舉伏讀

諭旨原奏於崇本抑末諄諄垂誡自當仰體

朝廷內顧邦本之至意首以不擾民生爲主稅課之贏絀猶其次也欲不擾民必須輕稅蓋貨之稅輕者走私之利亦輕稅重者走私之利亦重故稅輕則民重犯法而偷漏少稅重則民輕犯法而偷漏多偷漏少則法可寬偷漏多則法必嚴法寬則不擾民法嚴則擾民自然之理也然光緒十一年與英國所定洋藥稅釐併徵專條有中國應許此等貨色在行銷洋藥地方開拆者如有應納稅捐等項或當時或日後不得較土煙所納稅捐格外加增之議今土藥定稅若輕於洋藥恐彼將藉爲口實則土藥稅捐又有不得不與洋藥相等之勢查總稅務司赫德申呈總理衙門條陳內

稱洋藥在印度每百斤先須完稅約二百五十兩運赴中國復徵稅釐一百十兩等語故彼欲將土藥比照洋藥在印度出口之例先收落地稅一百十兩又比照洋藥在中國進口之例再收關稅釐捐一百十兩是每土藥百斤應完二百二十兩矣殊不知洋藥在印度所完與中國所完乃兩國之稅中國土藥並不運至外國而於中國兩次重複徵收是視一國如兩國而與專條內行銷洋藥地方所納稅捐字樣不合故土藥稅捐額數但須與洋藥在中國進口所完稅釐數目無所軒輊即與條約不背惟查各省土藥價值每百斤自一百餘兩至三百餘兩不等貨之高下懸殊價之低昂各異若不論價低昂而一例按其斤數比照洋藥收稅未免偏枯必須估價定稅方爲公允現在洋藥每百斤售價自三百八九十兩至四百八九十兩不等折中約四百四五十兩以稅釐一

百十兩核之約計每價百兩徵稅釐二十四五兩之數擬請將土藥亦按價每百兩其徵稅釐二十四兩惟洋藥祇有關稅釐捐兩項無落地稅土藥則當分爲落地稅八兩關稅八兩釐捐八兩合計共二十四兩如此則與洋藥稅釐額數銖兩悉稱無畸輕畸重之處可免滋生異議而落地稅關稅釐捐三項俱全分次徵收係屬土貨辦法與總稅務司原議亦相脗合至於稽徵之法則與洋藥情形又不相同洋藥先至海關後分運於內地必併徵而後稽察易周土藥先散出於內地後過關卡必分徵而後商力易舉各州縣出產土藥之地散漫難稽不比洋藥進口非報海關不能起岸自非稅則稍輕使走私無甚大利斷不能免繞越偷漏之弊而條約所限又不能輕於洋藥惟有將落地稅釐捐關稅分作三次徵收則每次皆止值百抽八雖未減輕而不覺其重若能認真稽

收一無擾累商民各顧身家似尙不致行險徼倖難於防範細查直隸各州縣之種罌粟畝數甚少與川滇及東三省情形不同其自種自食者難以計數外如甯河豐潤灤州薊城薊縣及大名順德所屬州縣閒有種者皆有商販於四五月閒買漿晒土而農民彼時收漿亦必隨手變賣毫不停留尙有經紀在市爲之評價官不過問絕無官吏私收稅捐隱匿入己之事今擬請將土藥落地稅責成各州縣辦理飭令種藥各州縣各募充土藥官牙一名或數名設立土藥集市一處或數處凡以土藥皆於集市交易由官牙過秤評價按價每百抽八完納落地稅給予落地稅印花黏貼其官牙許照各項牙行常例按三分抽用稅出於買主用出於賣主私相交易者查拏罰辦黏有落地稅印花之貨運至別州縣不再徵落地稅運過釐卡再按價每百抽八完納釐捐黏貼釐局印

花黏有釐局印花之貨運至別處釐卡不再徵釐運至稅關再按價每百抽八完納關稅黏貼關稅印花迨三次納畢無論運至何省何處不再重徵無印花者卽爲私貨照章罰辦並照總稅務司所擬省城設立土藥關之議於省城設立土藥總局遴派委員專司其事關稅印花卽用監督關防釐捐印花卽用釐局關防惟落地稅印花若用各州縣印信不能盡一且恐州縣徵多報少無可稽考應專刊稽徵土藥落地稅木質關防一顆存於總局並刊騎縫印花板式鈐用關防分發各州縣應用各州縣領回加蓋本州縣印信按包黏貼截根繳回備查各州縣准於所收落地稅內酌提一成作爲經費不准額外需索絲毫總局費用於所收稅項內作正開銷至多亦不得逾一成之數如此則於條約無違於民生無擾似屬兩得當此試辦之初雖每年可收稅釐若干不能豫計

成數而以各州縣所收牲畜花布等稅辦法比較似落地稅一節不致毫無把握且立法簡易便於商民果能認真經理自可日有起色至完落地稅之後應准其隨地銷售過關過卡能否如完落地稅之數則不可知惟有嚴查走漏明定罰章以杜弊端而裕稅課所有酌議直隸徵收土藥稅釐緣由理合恭摺覆陳伏乞皇上聖鑒訓示謹

奏

機器局報銷摺

光緒十六年十二月十七日

奏爲天津機器局光緒十四年分動用經費照章造冊報銷恭摺仰祈

聖鑒事竊照天津機器局經費奏明動撥津海東海兩關四成洋稅截至光緒十三年止業將收支款目造冊奏報經部核覆准銷並將十四年支給薪工等款分別咨部立案茲據該局司道沈保靖等將十四年分應行造銷各冊分晰開報計上屆存銀八萬一千七百三十六兩有奇本屆十二箇月其收撥解四成洋稅並奉撥出使經費及各省撥還銀三十六萬七千三百二十一兩有奇其支銷銀二十九萬六千八百兩有奇應存銀十五萬二千二百五十七兩有奇業經定購外洋器料並添建廠房工程動用應歸付清價腳及工竣之年報銷所有本屆應銷各款仍照向章各歸

各冊計全案收支總數及員弁司事夫役人等薪工爲第一冊購辦物料續建工程及核付保險運腳等項爲第二冊收支物料分項造報用存物料作爲光緒十五年舊管爲第三冊製成軍火撥發各項爲第四冊外撥各船薪糧物料及行營製造局用料爲第五冊神機營撥用物料爲第六冊其製成軍火仍造冊咨送總理各國事務衙門備查至製造各項器械皆仿西洋新式難以例價相繩循照歷屆章程實用實銷詳請具奏前來臣查該局所呈各冊復加確核委係核實動用毫無浮冒北洋籌辦海防拱衛畿輔各營需用軍火爲費不貲加以創立海軍凡鐵艦快船魚雷艇水雷營及各口礮臺應需軍火名目既多關繫尤重該局爲水陸各軍取給之源外省又時來請撥必須設法籌備惟應領額款僅指津東兩海關四成洋稅及海軍衙門撥給洋藥釐金款少用

多時虞竭應須添造西洋新式長礮鋼彈新式栗色火藥雖海軍章程內奏明應月撥銀八萬兩乃各省關解難足額未能如數勻撥經費實形支絀惟有督飭局員就款撙節動用勉力支持冀免貽誤除將清冊分送總理衙門暨戶兵工三部查照外所有天津機器局光緒十四年動用經費造冊報銷緣由理合恭摺具奏伏乞

皇上聖鑒謹

奏

各省捐助直賑數目摺

光緒十六年十二月十九日

奏爲直省辦理賑務收到各省捐助銀兩先行截數恭摺奏報仰祈

聖鑒事竊查本年夏間霪雨爲災各河漫溢綜計順天被災幾及二十州縣直隸被災竟至四十餘州縣順屬營蒙

恩賞內帑並部庫銀十萬兩大錢五十萬串粟粳米二十六萬五千石又撥京外八九十三箇月海防捐銀約四十萬兩直屬亦蒙恩准於藩運各庫動撥銀六萬兩並截留江北漕米三萬六千石奉天粟米一萬二千七百餘石

仁施浩蕩薄海同欽惟直屬地廣災重所撥銀米僅敷夏秋急賑並冬令粥廠及災重數州縣加撥米糧之用其餘各河漫口並籌備各處冬賑銀數臣於奏請推廣賑捐摺內聲明約計非二百萬

金不能成事確係必不可少之款直省本爲缺額之區續於藩運兩庫籌撥永定河工款銀十萬兩已形竭蹶而近省各州縣冬賑復由藩司竭力籌撥實屬搜括殆盡其天津河間永平遵化四屬二十餘州縣被水災黎嗷嗷待哺一籌莫展焦灼方深臣亦深知皇恩高厚如果爲民請命按照順屬撥款披瀝上陳定必仰荷聖慈隆施立沛但需口時艱旣慮部庫爲難又恐分近畿之力再四躊躇茫無所措臣惟有率屬倡捐一面電函馳告各省督撫將軍臣求助鄰封藉資集腋幸各省力顧大局念係畿疆重地救災之切百倍尋常無不飭屬倡捐廣爲勸募並籌鉅款先行墊解俾直省各河應堵漫口次第興工告竣各屬應放冬賑得以及時舉辦全活災黎不可數計實臣始願所不及自應將各省指捐直賑銀兩先行截數

奏報計自本年七月起截至十一月底止除漕運總督臣松椿福
州將軍臣希元閩浙總督臣卞寶第並候補臬司成孚廣西思恩
府劉恩濬陝州知州趙希曾浙江廩生龐元濟已革廣東候補道
傅廣已革河南候補同知秦培等倡捐並勸集各鉅款業經先後
專摺奏請獎敘外此外計收到奉天將軍總督臣裕祿捐銀一萬
兩原任兩江督臣曾國荃籌捐銀十萬兩四川督臣劉秉璋倡捐
並勸集銀七萬兩兩廣督臣李瀚章籌捐銀五萬五千七百兩浙
江撫臣崧駿籌捐銀十萬兩安徽撫臣沈秉成籌捐銀二萬兩江
西撫臣德馨山東撫臣張曜山西撫臣劉瑞祺湖南撫臣張煦各
籌捐銀一萬兩臺灣撫臣劉銘傳籌捐銀七千二百兩廣西撫臣
馬丕瑤籌捐銀六千兩兩湖督臣張之洞湖北撫臣譚繼洵倡捐
並勸集銀二萬零八百兩雲貴督臣王文韶雲南撫臣譚鈞培倡

捐並勸集銀二萬零一百兩貴州撫臣潘蔚捐銀二千兩陝甘督
臣楊昌濬倡捐並勸集銀二萬一千兩陝西撫臣鹿傳霖籌捐銀
一萬一千兩東河督臣許振禕江蘇撫臣剛毅各籌捐銀三萬兩
出使英法大臣薛福成捐銀一千二百兩署四川提臣錢玉興籌
捐銀八千零八十兩粵海關監督廣英籌捐銀六千兩前光祿寺
卿黎兆棠山海關道誠勳上海道聶緝槩前署津海關道孫士達
各捐銀二千兩廣東雷瓊道朱采捐銀四千兩廣東愛育堂捐銀
一萬四千四百兩香港東華鏡湖兩醫院共捐銀七千兩以上共
收銀五十九萬二千四百八十兩均經飭局兌收隨時撥放工賑
之用惟自冬徂春爲日甚長明年青黃不接之時尤須豫籌接濟
各河漫口雖已分別堵合而秋閒工作之時雨水夾隄艱於取土
明春須一律加培高厚方資捍禦且有正河及一二支河必須大

加疏濬並應添開減河始能分洩通暢竊計工撫兩項爲款仍屬不貲各省推廣賑捐雖經開辦尙未報解分毫嗣後如仍能踴躍輸將源源接濟臣斷不敢上煩

宵旰焦勞儻款少不敷分布屆時惟有奏乞

恩施以廣

皇仁而蘇民困至於各省疆臣並各司道籌解以上款項除福建陝甘臺灣並漕臣所捐銀兩內有指明分撥順天者已飭籌賑局詳請分解外其餘均係聲明順屬月行逕解專款指協直賑或由各省自行請獎或由直查取官紳履歷造冊咨部核獎自應先行劃清界限以免轆轤此後如有勸辦推廣新捐解到再行酌量分撥順屬以資應用各省疆臣均能公忠體國慷慨恤鄰實於時局大有裨益應請

聖恩將各督撫等先行交部從優議敘其有自捐之款並俟查明准其移獎子弟以示鼓勵勸捐出力之司道等統俟事竣奏請獎敘所有各省籌捐直賑銀兩先行截數奏報緣由理合恭摺具陳仰祈

皇上聖鑒敕部立案再各省捐解棉衣應與本省官商紳富捐賑銀數統俟彙齊再報合併聲明謹奏

工賑收支數目摺

光緒十六年十二月十九日

奏爲查明光緒十四年七月至十六年五月籌辦工賑收支銀錢米衣照案開單彙報仰祈

聖鑒事竊前因直屬成災地方辦理賑撫業將收支各款截至十四年六月止開單

奏報經部議令造冊送部核銷因查直隸查放賑撫向係體察情形變通成例酌量籌濟至挑築疏濬各工係招集少壯災民計口授值或就地勸捐仍歸民辦或酌派各營幫同力作量予犒賞不給方價工賞各項均係核實酌辦並無一定例章奏請仍照歷屆奉准成案免其造冊奉

旨著照所請該部知道欽此欽遵在案伏查十四年夏秋之交連朝大雨西北邊外山水陡發宛平房山等縣煤道沖斷永定河南

二北上等汛漫口多處附近州縣田廬淹浸十五年秋長垣等處又多遭水工賑並舉籌款維艱經臣咨商河南山東撫臣幫貼工款並於藩庫及海防支應局酌提款項及本省外省勸集捐輸遴派員紳分赴災區確查散濟一面將沖刷河隄各工擇要修治以工代賑並調撥淮練各軍幫同挑辦酌給筐鉢之費聞有向歸民辦之工亦經酌給津貼用示體恤應將收支銀錢米衣自光緒十四年七月起至十六年五月止核實開報飭據籌賑局司道詳稱上屆原存連此次新收各款內除專案奏銷外實計收用銀二十八萬九千七十八兩二錢五分一釐五毫七絲三忽六微津錢六萬二千六百九十二串五十文漕米二萬七千九百七十七石大米六千一百七十六石四斗粟米一萬一千三百六十五石九升七合五勺棉衣四萬六千三百七件除支發外應存銀九千八百

四十兩四錢八分八釐四毫八忽六微津錢一千四百四十五串
八十六文漕米四千七百九十石九斗四升五合大米一千二十
六石四斗二升五合粟米一千九百三十五石七斗一升四合已
歸十六年六月以後水災案內支用月行開報等情前來臣查此
次辦理賑撫仍恪守定章凡有不急可省之費無不力加裁汰其
應賑者先由州縣查明村莊災歉分數由府廳督同覆勘相符再
派廉幹員紳確查戶口核實散放不假胥役之手災輕則口多糧
少災重則口少糧多隔水泛舟行泥乘輶孤村荒落無敢或遺委
員薪水川資由司局酌給毫無擾累復於天津及保定省城分設
粥廠米廠留養貧民並給棉衣藥餌其遠來就食無力歸耕者則
給籽種口糧遣回原籍俾安生業至各處隄河等工均揀派道府
員紳與賑局司道擇要籌辦招集災黎就地傭趁工賑兼施所用

之款涓滴歸公臣與司道認真督察不准稍有弊混茲復詳加稽核委係實用實銷並無絲毫浮冒謹彙開清單恭呈御覽仰懇

天恩俯照歷屆奏准成案免造細冊以昭核實而免繁費理合恭摺具陳伏乞

皇上聖鑒訓示謹奏

謹將光緒十四年七月起至十六年五月底止籌辦災賑工
撫收發銀錢米糧棉衣數目核實開具清單恭呈

御覽

上屆報銷原存項下

一存銀十萬九千七百十三兩八錢三分九釐八毫一絲三忽六
微

津錢二萬一千七百九十四串三百五十文

漕米二萬七千九百七十七石

粟米四千三百九石九升七合五勺

棉衣一萬三千七百一十件

十四年秋冬收款

一收藩庫撥地糧銀三萬二千兩

一收順天府尹撥發津貼西山修道銀一千一百九十七兩一錢分

一收天津葛沽營田租大米八十八石二斗

一收提銀易換津錢三千串

一收采買粟米三千五百四十六石又大米二千石

十五年收款

一收本省外省官紳捐賑銀八萬六千八百四十五兩一錢八分七釐五毫六絲津錢一萬八十七串七百六十二文棉衣三萬二千五百九十七件

一收藩庫撥地糧銀二萬五千兩

一收清河道庫奴夫生息銀九百十五兩八錢七分六釐七毫又淳沱河生息銀二千兩

收河南幫貼培修長垣境內黃河北岸月隄等工銀一萬二百十四兩

一收天津海防支應局撥貨釐銀一萬六千七百六十五兩八分七釐三毫

一收天津葛沽營田租大米八十八石二斗

一收提銀易換津錢一萬一千八百八十串

一收采買粟米三千五百十石又大米四千石

十六年春收款

一收本省外省官紳捐賑銀二萬三千七百六十一兩六錢一分七釐津錢一萬五千九百二十九串九百三十八文

一收山東幫貼挑挖四女寺減河工程銀五千兩

一收天津海防支應局撥貨釐銀三萬四千五百三十一兩五錢

三分四釐二毫

以上原存新收共銀三十四萬七千九百四十四兩二錢五分二釐五毫七絲三忽六微內除提銀五千兩易換津錢一萬四千八百八十串已列收錢款又提銀二萬五千二百二十八兩二錢五分四釐采買大米六千石粟米七千五百六十石已列收米粟項下尙計原存新收銀三十一萬七千七百十五兩九錢九分八釐五毫七絲三忽六微內除永定河南二大工經費銀二萬八千六百三十七兩七錢四分七釐業經專案奏銷應行登除外實計收用銀二十八萬九千七十八兩二錢五分一釐五毫七絲三忽六微津錢六萬二千六百九十二串五十文漕米二萬七千九百七十七石大米六千一百七十六石四斗粟米一萬一千三百六十五石九升

七合五勺棉衣四萬六千三百七件

十四年秋冬支款

一鹽山縣饑民一千三百九十四戶折成六千六百七十五大口
半計發銀一千兩

一慶雲縣饑民三千三百四十戶折成九千九百六十二大口計
發銀一千兩

一天津縣饑民六千三百七十五戶折成一萬八千九百七大口
計發銀四千一百八十八兩七錢漕米八千一百十石

一固安縣饑民三千一百九十八戶折成八千八百四十三大口
計發銀二千七百三十九兩七錢六分三釐漕米七百石棉衣五
千件

一涿州饑民七百四十七戶折成一千七百五大口計發銀一千

二百二十七兩五錢八分七釐

一良鄉縣饑民一千七百八十六戶折成四千六百七十七大口
半計發銀三千一百三十九兩六錢五分

一宛平縣饑民七十三戶折成一百九十三大口計發銀九十三兩

一安州饑民六千二百三十八戶折成一萬八千六百四大口計
發銀一萬二千一百十四兩

一保定省城四關米廠收養饑民折成一萬三百二十二大口自
十四年十一月十六日開設起至十五年二月初十日撤廠止計
發銀二千兩大米一千四十四石九斗六升粟米一千五百八十
七石一斗五升棉衣九千件

一天津郡城粥廠收養饑民折成八千六百七十一大口自十一

月初一日開設起至十五年二月初八日撤廠止又修蓋廠房添置器具並柴薪鹽菜資遣等費計發津錢一萬八千一百二十一串一百十二文粟米四千七百三十四石三斗二升一合五勺棉衣六千七百二件

一保定省城棲流所養病堂實直局經放貧民二千二百九十六口計發漕米一百十二石三斗二升五合粟米八百六十四石九斗二升三合五勺

一天津廣仁堂經放貧民一千七十一口計發大米八十八石三斗棉衣七百件

一天津守望局經放貧民棉衣五千二百六十六件

一京都廣仁堂經放貧民棉衣一千件

一各州縣查放賑撫勘工監兌委員薪水盤費等計發銀九百八

十二兩

一宛平境內西北山中修道自黃石港起柴廠村止共長一萬七百四十三丈六尺均寬四尺至一丈五尺高深二尺至二丈不等計發銀一萬一千一百九十七兩一錢一分

一霸州靜海境內培修中學河堤工共長一千八百九十一丈頂寬八尺至一丈底寬二丈至三丈高四尺至六尺不等計發津錢四千二百七串八十二文

十五年存支款

一天津境內買家清河加寬濬深工長三千七百三十二丈五尺口寬六丈至十丈底寬二丈七尺至五丈深八尺至一丈不等計發銀一萬四千八百七十二兩一錢三分八釐四毫津錢四千九百九十八串一百三十四文

一通州境內平家疇湖白河險工挑清共長九百六十七丈五尺口底均寬一丈二尺至九丈深二尺至八尺又鎮築壩埽共長四百五十一丈均寬一丈至九丈高二尺至一丈一尺不等計發銀四千八百八十三兩四錢九分八釐

一祁州安平博野雄蠡高陽任邱境內潞龍大清趙王等河裁灣取直濬深等工共長三百九十丈口寬十丈至十二丈底寬五丈至六丈深六尺至一丈一尺險要處鎮築壩埽共長一千八十六丈均寬六尺至一丈加高二尺至一丈不等計發銀一萬二千八百三十九兩一錢四分六釐七毫酒米七百石

一長垣境內黃河北埵月隄後戢土格培修等工共長四千一百六十七丈頂寬二丈至四丈底寬六丈至八丈高四尺至一丈一尺又桑園村添築壩埽共長四百八十七丈均寬二丈至九丈高

深四尺至三丈不等計發銀二萬八千八十三兩一分津錢二千六百五十八串一百十文漕米四千一百七十三石七斗三升一永定河麻袋月夫兵飯食等項計發銀三千九百三十八兩七分三釐九毫

一永定河求賢灰壩加高面抹塞門德土龍骨寬二十一丈進深五丈迎水簸箕外寬二十五丈進深四丈出水簸箕外寬二十九丈五尺進深十二丈又加培減河兩岸隄埝工長一千五百七十一丈二尺寬一丈至五丈高一尺至五尺五寸不等計發銀九千五百五十兩八錢三分一釐六毫五絲漕米一千一百七十石十五年秋冬支款

一天津縣饑民六千三百三十九戶折成二萬四百十五大口半計發銀六千二百十四兩三分五毫六絲

一鹽山縣饑民四千八百六戶折成一萬二千四百四十九大口計發銀三千兩

一青縣饑民二千四百七戶折成七千六百九十六大口計發銀一千一百九兩七錢四釐

一靜海縣饑民二千七百十二戶折成八千五百八十四大口計發漕米九百石

一滄州饑民三千九百四十三戶折成一萬三千五百十二大口計發津錢五千四百四十三串八十文

一南皮縣饑民三百八十五戶折成九百七十六大口計發銀六百四十二兩一錢三分津錢八百十七串八百文

一獻縣饑民二千八百八十三戶折成九千五百四十五大口半計發銀二千兩

一吳橋縣饑民一千三十戶折成二千七百十九大口半計發銀四百兩漕錢四百串漕米七百石

一東光縣饑民五千九十七戶折成一萬八千四百五十一大口半計發銀五千六百兩

一安州饑民三千三百十戶折成九千七百八十三大口半計發銀三千兩漕米五千二百二十石

一保定縣饑民一百一戶折成五百九十大口計發銀二百兩

一大城縣饑民三千一百二十七戶折成一萬六千六百四十一

大口計發銀一千兩

一薊州饑民一千戶折成四千四百十九大口計發銀一千兩

一保定省城米廠收養饑民折成九千三百三大口自十一月十六日開設起至十六年二月十五日撤廠止計發銀二千兩大米

二千五百十四石四斗四升五合棉衣四千件

一天津郡城粥廠收養饑民折成五千七百八十九大口自十一月十三日開設起至十六年二月十四日撤廠止又修葺廠房添置器具並柴薪鹽菜資遣等費計發津錢一萬一千二百六十二串七百十八文粟米一千七百十四石八斗七升三合五勺棉衣八千七百九十九件

一保定省城棲流所養病堂寶直局經放貧民四千三百十六口計發大米一千四百十四石一斗七升粟米五百二十八石二斗一升五合

一天津廣仁堂經放貧民一千八十口計發大米八十八石二斗棉衣七百件

又守望局經放貧民棉衣四千一百四十件

一京都廣仁堂經放貧民棉衣一千件

一各州縣查放賑撫勘工監兌委員薪水盤費計發銀二千七十四兩

十六年春支款

一天津縣饑民一千九百七十六戶折成六千三百六十七大口半計發銀一千二百兩津錢五千八百八十串六百八十文

一靜海縣饑民七百六十三戶折成二千六百七十五大口半計發銀一千兩

一獻縣饑民二千八百七十六戶折成九千四百六十二大口計發銀二千兩

一東光縣饑民二千九十七戶折成八千四百四十五大口半計發銀三千三百十八兩六分一釐

一安州饑民四千七百五十六戶折成一萬二千四百三十二大口計發銀八千二百八十八兩

一文安縣饑民一千三十八戶折成三千五百七十一大口半計發銀七百兩

一保定縣饑民一百一戶折成五百九十一大口計發銀二百兩
一直東四女寺減河擇要疏濬工長三千九百八十丈三尺口寬八丈至十七丈四尺底寬四丈至十五丈二尺深一丈至一丈四尺添築滾水灰壩工長十五丈八尺頂寬五尺底寬四丈高三尺六寸迎水簸箕長七尺五寸出水簸箕長二丈八尺五寸又築草壩共長二十一丈一尺均寬九尺至一丈六尺高一丈七尺至一丈八尺五寸不等計發銀一萬一千四百六十一兩八錢七分
一東光南皮滄州鹽山境內宣惠河擇要疏濬工長一萬八千七

百七丈口寬五丈五尺至六丈二尺底寬三丈至四丈五尺深二尺四寸至六尺三寸不等計發銀一萬一千六百八十四兩四錢津錢二千七百六十七串三百八十文

一饒陽獻縣河間境內滹沱滏陽子牙等河兩岸隄埝擇要培修其長七千八百五十一丈頂寬一丈至一丈七尺底寬二丈二尺至五丈八尺高二尺至六尺又李謝等處挑淤其長四百七丈一尺均寬三丈至十丈深二尺至五尺又添鑿埽段其長四百六丈二尺均寬七尺至二丈三尺加高二尺至一丈六尺不等計發銀一萬四千九十三兩一分四釐津錢四千一百八十三串一百六十八文漕米四百石

一天津境內陳家溝金鐘河挑淤工長七千四百四十二丈口寬十丈至二十丈底寬五丈至十四丈深六尺至一丈一尺不等計

發銀四萬九千七百六十六兩六錢二分九釐四毫

又鳳河下游挑淤工長三千三百七十九丈八尺口寬五丈八尺至七丈七尺底寬五丈六尺深一尺至五尺不等計發銀六千三百七十六兩九錢八分六釐三毫五絲五忽漕米一千石

又霍家嘴減河頭建滾水石壩龍骨寬十五丈二尺進深三丈迎水簸箕外寬十七丈進深二丈一尺出水簸箕外寬十八丈進深七丈兩金牆各高一丈計發銀一萬六百四十五兩三錢八分七釐津錢四百五十九串七百文

一荊州境內擇要培修荆運河隄工長三百十四丈築成頂寬一丈至二丈底寬四丈至十丈高五尺至一丈八尺不等計發銀一千五百四十八兩津錢四十八串文

一安平博野雄蠡高陽任邱境內瀦龍大清等河險處鑲築埽壩

其長一千六百三十二丈均寬五尺至一丈二尺加高一尺至一丈又蠡縣劉家營截灣取直河工長一百七十四丈口寬十丈底寬四丈深一丈計發銀一萬八百七十兩三錢四分二釐
一永定河麻袋月夫兵飯食等項計發銀三千九百九十六兩七錢二毫

以上統共支發賑撫銀二十七萬九千二百三十七兩七錢六分三釐一毫六絲五忽

津錢六萬一千二百四十六串九百六十四文

漕米二萬三千一百八十六石五升五合

大米五千一百四十九石九斗七升五合

粟米九千四百二十九石三斗八升三合五勺

棉衣四萬六千三百七件

應存項下

計存銀九千八百四十兩四錢八分八釐四毫八忽六微
津錢一千四百四十五串八十六文
漕米四千七百九十石九斗四升五合
大米一千二十六石四斗二升五合
粟米一千九百三十五石七斗一升四合

李文忠公奏稿卷七十